

ROM

Pol Riita Rom Ma Yenya Keyichi Har Jey

APOSEL POL RIITA OTIIR YO MU MAJI

1 ¹Ada eeta Pol, Kraist Jisas riita ana yo oti ma hisiichi wochirek, ada hadabas majin kwodii wocho. ²Mashi God riita hadabas majin haken wori, riiti piirapet ye riita bar бага eechaba riiti jeyek keyir. ³Diita hadabas maji man diita nosapeka tawan riiti Yikapwa, Jisas Kraist, riina wor. Rii sokwa mak siir. Rii Devit riiti nobok yari, eeta riiti neja siir. ⁴Riita eeta holi God tabato. Riita harek, riina tiiriimo supuk awasen yeechi yesokwarek, rii eeta God riiti Yikapwa siiken. Dii eeta nona mukuchichu God riiti hapaga tawa boboyen. ⁵Jisas Kraist riita yo otiitar nobok ana eeka otiichirek ada eeta aposel siir. Otiiri, Jisas Kraist riiti hin yesokwataken eena otiir. Eyey nosapek ta ye i tawa ma miman Jisas riina hiki siitiichi sumowuken eena otiir. ⁶Kwota Rom akamak tawey, God riita kwona eechaba habato. Kwota Jisas Kraist riiti siiken eena habato. ⁷Eena kwota Romek tawey, kwona ada jeyen keyito. God riita kwona rukusiitawak, kwota riiti siiken eena kwona wocho. Noti Apoko God, Jisas Kraist piiriita kwona rukusiichi otiichinyak, kwoti inyaka wopu sa kepiba hiki ta.

POL RII ROM AKAMAK TAWA MA YENYA HEKEN HIKITAR

⁸Ada mapo kwona diina bak: kwota eeche tawey, ada kwona Jisas riiti hik God riina woshiato. Eyey nosapek ta ye tawa ma yecha kwota Jisas riina hiki siitiichichawa boboyen meejitawak, eena ada God riina woshiato. ⁹⁻¹⁰Ada God riiti yon eeji inyaka wopuk hehar otiitawey, God riiti Yikapwan hadabas majin sawotawey, God riipa kwona mukuchikiita eeji diita maji eeta siiken, God rii hecho eechaba eechaba nedii ada riina maji batawak, ada kwona bachitu. Ada God riiti inyakan wohecho riita

kapo otiichinyak, ada kapo ya kwoti misoman hekiita. ¹¹Ada kwona ya heken harapa hikitu. ada kwona ya Holu Spirit rii haken otiitawa boboyen haken hikitawak, kwona hehar yesokwa baken hikitu, eena ada kwona heken hikitu. ¹²Ada eeche hikitu kwota hiki siitiichichawa boboy sii ana kiyatay kiyaponak, ada hikisiitiichichawa boboy sii way awasen kwona kiyatayechi kiyapokiita.

¹³Kwo, eeji yaka kumwoy, na hiki ta: eechaba eechaba nedii ada kwona ya heken otiitawey, kapo boy boboyek adana nobo dasiipet? Ada anadii shebo shebo biish tar ma nobon mukuchirega, ye Jisas riina hiki siitiichichawaga, ada kwona eechaba nobon mukuchiken hikitawey, kwo riina eechaba hiki siitiichikiita. ¹⁴God riita ana yeyada hari, ada eechaba anadii man yeyadahabaken hikitu. Otii hechawa ma yenza, shebo shebo tawa ma yen maji pokiitar ma yen maji pokiinan biish tar ma yechaka ada yeyada haken hikitu. ¹⁵Eena ada kwona Rom akamak taweyn ada hadabas majin sawoken hikitu.

GOD RIITI HADABAS MAJI EETA GOD RIITI HAPAGA BOBOY

¹⁶Ada diita hadabas majin hiibiyakasakech. Dii eeta God riiti hapaga tawa boboy! Eeta Jisas riina hiki siitiichichawa ma yenza yesokwa yichi tawa boboy. Mapo Ju ma yesokwa yichitu. Anadii nosapeka shebo shebo tawa man eechaba yesokwa yichitu. ¹⁷God riiti hadabas maji sii God riita man wo sawo tawa boboyen eena nona mukuchichu. Diita boboy sii eeta hiki siitiichichawa boboy saniga. Mashi keyir maji eeche wocho: “Eeta ma rii hiki siitiichichaney, God riipa riina pichi hehar wosawo heechinak, nagwa nagwa ichanak, riipa eechaba eechaba takiita.”

EYEEY MA YE GOD RIINA MAGIIRECHIR

¹⁸Nota hecho God riita kwotay tawa boboy hevenek heechitawak, ma yechi kapasek boboyen eena sakato. Yecha kapasek boboyen otiitawak, God riiti omutiik tawa boboy siikenen vennyitu. Veeniyitawak, ma yecha diita omutiik tawa boboyen eena hechi otiitakasakech. ¹⁹Diita boboy ma yecha kiki hikichi siitiivey, eena God riitaba yechi misomak mukuchichu. ²⁰Mashi God riita diita nosapen otiir nedii sii i i diita apa nediiik God riiti hapaga riiti hadabas boboy riiti boboy nota henyani biish tawa boboy ma yecha hechar. God riita diita nosap eyey boboyen otiitarek, ma yecha eena heharek, riiti boboy siikenen hecho. Eecha otiitarek, ma yecha eena heharek, riiti boboy siikenen hecho. Eecha otiitarek, ma ye eena yechi kapasek hikichi otii tawa boboyen boyega shecha veenyik wonyak?

²¹Yecha God riina hecho. Hehawey, ye riiti hin yesokwakasakech. Riina woshiakasakech. Yaho. Yechi shebo shebo tawa inyaka hikishatawak, eena ye niyiki yichu. ²²Yichawak, ye eeche wocho, “Nota

eeta nagwa nagwa hiki tawa ma.” Wowak, ye eeta hikisha yeshatawa ma. ²³Yecha God riiti hin magiirechichi heechi riiti eechaba eechaba tawa hi kepin yesokwa yichikasakech. Yecha men ha tawa ma misomaga eecha teechi apoga tawa boboyen teechi kwashik tawa boboy hechawaga tawa boboyen ta siitiichi pak tawa boboyega eecha teechi yechi hin eena yesokwatar.

KAPASEK OTII YE I TAWA BOBOY

²⁴Ma yecha eecha kapasek otiitawak, God riita yenya heechitarek, ye inyaka kapasek woy hikitar nobon eena sumowutar. Sumowutarek, yecha awasen awasen kapasek boboyen otiitar. ²⁵Yecha God riiti omutiik tawa boboy siiken yari, ii heechi woshepii tawa nobon eena rukusiir. Worek, ye God riita otiir boboy yechi hin eena yesokwatarek, ye eyey boboyen otiir God siiken ri hin yesokwakasakech. Nota God riiti hiban na yesokwa ta. Eeta siiken.

²⁶Ma ye eecha kapasek otiitawak, God rii yenya heechirek, ye yechi maba inyaka wopuk hiki tawa nobon eena sumowutu. Eena sumowutawak mima ye riivisi tawa nobo kepin heechi ye yechi kapasek nobon ichu. ²⁷Ma ye eechaba mima ya tawa nobon heechi ye anadii man kapasek otii ye itu. Eecha otii ye itawak, anadii ma yechaka eecha otiito. Eecha otiitawak, eeta boboy yechak ya tawey, God riita eena awasen hakiita.

²⁸Ma ye God riiti nobon inyagak eeka heechikasakech. Wowak, God rii yenya heechirek, ye i God riita bokonar kapasek boboyen eena otiitar. ²⁹Worek, kapasek boboy yechana takiikiisiitawak, ye eena harapa kapasek boboy mayakan otiito. Yecha boboyen kwoya hechawak, kapasek hikitawak, man pi sowakwo tawak, akar man ow ana pichawak, woshepiitawak, akar man wosiiboy tawak, ³⁰akar man kapasek majin batawak, ye God riina yuyatawak, ye wohipi tawak, yechi hin harapa haba tawak, kapasek yoban hiki tawak, awi eepi majin nasowoy tawak, ³¹nobo miman anamesheroko tawak, maji siikenen yechi kujak sokwakasakech, anadii man yecha heharekasakech. ³²Yecha hecho God riiti lo maji eecha wocho: “Eecha otii tawa ma yepa hakiita.” Hiki tawey, heechi kapasek boboyeban eechaba otiito. Eechaba otiitawak, akar ma ye kapasek boboyen otiitawey, ye eecha wocho, “Eetata.”

GOD RIITA ANASAK TAWAY, NAGWA NAGWA ANASAKIITA

2 ¹Ma eecha tawey, eepi apoma, mii boy kapo anadii man kapasek hikichi maji ba diimato? Mii boy kiki sowak, diita yikadey boboyen mii otiito? Mii eecha otiitaney, mii yecha otiitawa boboy eechaba otiitawey, mii eeta mayama miiti hin dagiir poyebato. ²Nota hikitu ma ye kapasek otiitawey, God riita yenya anasatawey, rii eeta kepi

wey anasto. ³Wowak, eeji apoma, miita kapasek boboy otiitawey, diita yikadey kapasek boboyen anadii man ye otiinak, mii heney, mii yenya kapasek hikichi maji ba diimato. Eeta kapasek. Mii boy kapo eechea hikitu God riita miina saka wosawochikiitawak. ⁴God riita miina hehar otii tawey, miina kowu chichi hatawey, mii kapo eena yuyato. Mii kapo saka hiki tawak, God riita miina eechea hehar otiitawey, rii miita inyakan dareboyeken eena otii hechichu! ⁵Wowak, miiti mabiya sii giitawak maji meejikasakech. Eecha tawak, eena komas eeta nedii God riita nagwa nagwa anasanak, riita harapa kwotay tawa boboyen nota henyak, riipa miina harapa pikiita. ⁶God riipa eyey ma yecgha kapasek otiitawa boboyen homachichiawasen yechaban hakiita. ⁷Ma kaw ye yo kepin hapaga siichi otiitawey, hadabas boboyen, hi kepin eecheaeechaba tak tawa boboyen yeshatawey, iipa God riipa yenya kiyatayechi yesokwa yichinak, yepa eechea eechea siikiita. ⁸Anadii ma ye yechi noboban sumowu tawey, nobo kepin nasowoy tawey, kapasek nobon sumowu tawey, God riipa riiti kwotay tawa boboyen yechak gwoitiikiita. ⁹Ayo. Kapasek yo otii tawa ma yecha harapa kapa meeji takiita. Mapo Ju ma yecha kapa meejitakiita, komas anadii ma. ¹⁰Wowak, eeta ma ye yo kepin otiitaney, God riipa yenya hadabas boboy kepiweyn, hi kepin, eshar eshar tawa boboyen hakiita. Ju ma yenya mapo hanak, anadii ma yen komas habakiita. ¹¹God riita diita nosapek tawa eyeyma kaw yechi hin meejikasakech. Riita otii tawa yoban iiban homochichi hato.

¹²Eeta shebo shebo biish tawa ma ye Moses riiti lon yakasakech. Lo eeta yechaka biish tawey, ye kapasek yon otii tawey, God riita yenya anasanak, riita hechar ma ye ya yenya lo majin sawokasakech. Wowak, Ju ma ye lo majin meejir. Ye meejiri, kapasek yon otii tawey, God rii yenya anasanak, riipa yenya loka anasatakiita. ¹³Na hiki. Ma yecha lo majin biish meejibatawey, God riiti misomak kepi takasakech. Yaho. Ma ye o maji meejichi sumowu tawey, ye eeta God riiti misomak kepi tawa. ¹⁴Eeta shebo shebo biish tawa ma ye loka takasakech. Eecha tawey, yecha yechi inyagak God riiti lon sumowu tawey, ii yechi inyaka eeta lo. ¹⁵Yecha yo kepin otii tawey, sii eeta mukuchichu eeta lo eeta yechi sugu wopuk tawa. Yechi inyaka mukuchibato dii eeta siiken tabato. Yechahiki tawey, yechi inyaka kaw eechea wocho: “Ada otiiri, eeta kepi,” eechea wocho: “Ada otiiri, eeta kapasek.” ¹⁶Eecha tawey, kwo komas eechea siikiita. Eeta nedii God riita Jisas Kraist riitaka eyey ma yechi otiichi veenyi tawa boboyen riita anasakiita. Diita hadabas majin ada sawotawey, sii eechea wocho.

JU MA YECHEA EECHEA LON HIKI TARI, EETA MAN YESOKWA YICHATAR

¹⁷Kwo boyen shecha otiito? Kwota mayama eechea habato, Ju ma. Kwoeecha hikitu, loka kwona yesokwa yichikiita. Kwo eechea wocho:

“No God riiti ma.” ¹⁸Kwo God riita tawa tobon hecho. Kwo lo majin meejitarek, eena kwo nagwa nagwa nobok sumowu ichu. ¹⁹Eecha tawak, kwo eena eecha hikitu mi dumu ma yenya nobon mukuchichu. Kwo hikitu kwo eeta haba niyik tawa ma yenya okoreechichu. ²⁰Kwo eecha hikitu nota hikinani biish tawa man nobo mukuchichawa ma, yikapwan maji pokiitawa ma. Kwo eecha hiki tawey, lo notaka eecha tawey, siitaba nona eyey boboyen mukuchinak, eechaba eechaba tak tawa mukuchichawa boboy notaka tawa. ²¹Kwo anadii man maji pokiitu. Boyewak, kwo mayama kwona maji pokiitu? Kwo eecha sawoto opoche hiyi yatanakech. Eecha wochi kwo kapo hiyi yato? ²²Kwo eecha wocho nobo miman opoche anemesherotanakech. Kwo eecha wochi kwo kapo nobo miman anemesherototo. Kwo woshepii tawa goden harapa yuyato. Eeta kepi. Wowak, kwo kapo shebo shebo tawa ma yechi lotu akak tawa boboyen hiyik yato. ²³Kwo kwoti hinmayama yesokwachi eecha wocho God riiti o notaka eecha tawa. Wowak, eecha wochawey ii kwo God riiti on reekiitawak, God riina hiibiya ya majin bato. ²⁴Ayo, God riiti maji eecha wocho, “Ju ma kwo eeta lon reekiitawak, eena shebo shebo tawa ma ye God riiti hin kapasek habato.”

²⁵Kwota on sumowutanak, maba sapin diigii tawa boboy sii eeta kwona kiyatayeto. Kwota on nasowoyeney, ii maba sapin boyak diigiito? Ii kwona kiyatayekasakech. ²⁶Biish shebo shebo tawa ma ye maba sapin diigiinan biish sowey, ye lo majin sumowu taney, God rii yenya hechiniga eecha wokiita: ye eeta maba sapin diigii hamar. ²⁷Wowak, shebo shebo tawa ma ye kwota otii tawa tobon henyak, ye kwona wohega maji bakiita. Kwo God riiti on jeyek keyi hamari, maba sapin diigii hamar. Eecha otiirek, kwo eena lo majin nediik reekiito. Reekiitawak, shebo shebo tawa ma ye lo majin sumowutawak, yi maba sapin diigiinan biish tawak, wowak, eena ye kwona wohegakiita. ²⁸Ada kwona wohecho: “Nama eeta Ju ma siiken tawa? Nama maba sapi siiken diigii hamar? Maba sapiban sobo diigii tawa ma ye eeta Ju ma siikenekasakech. Eeta maba sobon otii tawa boboy. ²⁹Ma eeta Ju ma siiken tawey, ye eeta yechi sugu wopuka eeta Juba tawa. Ii eeta yechi sugu wopuk tar kapasek boboy diigii hamar. Dii eeta Spirit riiti yo. Lo siiti yokasakech. Eecha otii tawa yikadey ma yen ma ye yechi hin yesokwakasakech. God riita yechi hin yesokwato.

KAPASEK BOBOY SII BOBOY KEPI SIINA DAGIIREPOYEKASAKECH

3 ¹Eecha tawak, Ju ma ye anadii ma yen shechapa heechi mapo ikiita? Kapo boy yikadey nobok yenya kiyatayeto? ²Ayo, yechi eeta nobo sii yenya harapa kiyatayeto. Mapo, God riita Ju ma yenya riiti majin harek, yecha eena siitii kowutar. ³God riita yenya harek, yecha hehar siitii kowunan biish siiri, wowey, God riipa boy yenya kapo hehar siitii

kowukasakech? ⁴Yaho. Riipa hehar siitii kowutakiita. God riita batawa maji eeta siiken tawa. Ma ye woshepii maji batawak, God riita woshepii maji bakasakech. Riita mashi keyir maji riina eeche wocho:

“Mii miiti maji na siiken maji ba ta.

Batanak, miina ye i anasaney,
kwota eeka kapaga siikiita.”

⁵Nota kapasek yo sii eeta God riita otii tawa boboy kepin nona mukuchiney, nopa kapo shecha awasen wokiita? No kapo wokiita God rii nona wosawuchinyak rii kapasek otiito? ⁶Yaho. Biish. God riita kapasek anasaney, riipa kapo boyega diita nosapek tawa ma miman anasatakiita? (Ma yechi inyaka eeche hiki taweyn, eena ada bato.)

⁷Ada woshepii maji baney, eeche otiiney, God riiti omutiik tawa boboy siiken sii geenyik yanak, God riiti hadabas boboy kepin kawka henyak, kapo wohekiita: ada kapasek yon otii tari, boyewak God riipa ana pikiita? ⁸Kapo ma por apa eeche wokiita: “Nota kapasek boboy na otiita. Otiitanak, God riiti boboy kepin nota hekiita!” Wowak, ma kaw eeche wocho: Diita otii tawa abon eena ada bato. Wowak, diita yikadey ma yepa ya kapasaken yakiita.

YO KEPIN OTII MA POR TAKASAKECH

⁹Wowak, nota kapo Ju ma kepi tawak, anadii ma kapasek tawa? Yaho. Ada kwona mukuchuwa kapasek yo otii tawa boboy nona eyey, Ju ma, anadii ma, nona eyey gamu poyetu. ¹⁰Mashi keyir maji sii eeche wocho:

“Ma kepi por takasakech. Yaho.

Otii hechawa ma por takasakech.

¹¹God riina yesha he ma por takasakech.

Ye eyey God riina magiirechir.

¹²Eyey kapasek siir.

Yo kepin otii ma por takasakech.

¹³Yechi kuja tiiriimo supuga eeche tawa.

Yechi tarakwoy sii woshepii majiban bato.

Yechi kuja wo hopo kwoyayega eeche tawa.

¹⁴Owuka eeche tawa kapasek maji yechi

kuja takiikiisii siitiito.

¹⁵Yecha amaba i man pi sowakwokiita.

¹⁶Ye eechaba boboyen otii kapasek siitawak,
man harapa nomo yatawa boboyen hato.

¹⁷Ye podat nobok sii inyakan eshar eshar
hikikasakech.

¹⁸God riina akii tawa nobon ye makabek
heechikasakech.”

¹⁹Nota eeche hikitu eyey lo maji sii lon sumowuken otii tawa ma yenya bato. Eena ma por eeche wokusakech, “Ada ma kepi.” Yaho. Nota

eyey nosapek tawa ma God riiti misoman hiibiiyaka tawa ma. Ma ye lon hechawey, ye yechi kapasek boboy hechawey, yecha yechi kujan dasiipeto. ²⁰Lon sumowu tawa nobon sumowuk otiiney, ii ma God riiti misomak kepi otiikasakech. Lo sii noti kapasek boboyen eena mukuchichu.

**MA JISAS RIINA HIKI SIITIICHICHAWEY, RII
EETA GOD RIITI MISOMAK KEPI TAWA**

²¹Wowak, God riita ma kepi siik riiti misomak otiwa nobon God riita nona geenyik mukuchir. Ii o siina sumowu nobokasakech. God riiti maji piirapet yechi maji eeta geenyik kwodii wochar. ²²Eecha wochar: Eyey ma ye Jisas Kraist riina hiki siitiichinyey, God riita otiichinyak, ye riiti misomak kepi sowa. Eyey ma ye hiki siitiichichawey, riita yenza otiichichu. Ye saniga saniga takasakech. Ye podatebak yawa. ²³Nota eyey ma kapasek boboyen otii tarek, no God riiti hadabas tawa boboyen nota eena esanato. ²⁴Wowak, eecha tawak, God riita nona rukusii tawa boboyen yeyada hatawey, ii eeta Jisas Krasit riiti nobok riiti misomak nona otii kepi siir. Otii kepi siirek, no gaba riiti yon otii wakasa makasakech. ²⁵God riita Jisas riina ma yenza harek, rii harek, ma ye riina hiki siitiichichawak, rii ma yechi kapasek boboyen bachi tawa nobo siir. God riita Jisas riina ma yenza heechi riita nona mukuchir God riiti misomak maka siik tawa boboy. God rii mashi tar ma yecha kapasek boboyeka tarin, God riita ameya saka pirek. ²⁶Wowak, apa riita ma yechi kapasek boboy hechawak, eena bachi poyeken otiito. Eecha toiitawak, dii eecha mukuchichu rii eeta man otii kepi siiken otiito. Eyey ma Jisas riina hiki siitiichichawey, God riita yenza otii mak siik otiitawak, dii eecha mukuchichu rii eeta nagwa nagwa otii tawa God kepi.

²⁷Boy boboy siita tawak, nota noti hin mayama yesokwato? Yahoo. Biish. Ma rii o majin sumowutaney, rii kapo mayama riiti hin yesokwatakiita? Yahoo. Hiki siitiichinyey, rii God riiti hin yesokwatakiita. ²⁸Nota eecha wocho: hiki siitiichichawa nobok God riita eeka man otii kepi siito. Loban sumowu tawey, ii otii kepi siikasakech. ²⁹God rii boy Ju yechiba God? Yahoo. Rii anadii shebo shebo tawa ma yechi God tabato. ³⁰God rii eeta podareba. Ju ma yecha Jisas riina hiki siitiichinyey, God riita yenza otii kepi siikiita. Anadii shebo tawa ma ye Jisas riina hiki siitiichinyey, God riita yenza otii kepi siibakiita. ³¹Dii boy kapo eecha wocho o majin nota boy kayek rabok? Yahoo. Eecha otiikasakech. Nota lo siina siiti eemebak eeka heechitu.

**GOD RIITA EBRAHAM RIITA OTIITAR NAGWA
NAGWA NOBON SAWOTAR**

4 ¹Ebrahim rii noti wayega. Boy majika nota riina tawa? ²Ebrahim rii yo otii tawa abo kepi siita God riiti misomak kepi sokwaney,

ii Ebrahim rii sa riiti hin mayama yesokwaba ta. Wowak, ii opoche God riina eecha wochanakech rii kepi tawa. ³Boyewak? God riiti maji eecha wocho: “Ebrahim rii God riina hiki siitiichichari, eena hechi rii nagwa nagwa ichawa maga eecha yar.” ⁴Ma por rii yo otiichi yan yato. Yan yanak, rii eechahikitu dii eeta eeji yon tokowa. Rii saka eecha hiki tawak, yeyada ha tawa boboy. ⁵Ma por rii otii tawa yon henyan siiney, rii God riitaban hiki siitiichichaney, God riita eena hechi eecha wocho kata ma riita hiki siitiichichawa boboy sii riina otii kepi tawa. Eecha tawak, kapasek boboy tawa ma ye nagwa nagwa i ma siikiita. ⁶Devit rii maji kepin bar eeta yikadey man God riita hiki siitiichichawa boboyek eeka otii kepi siir. Yok otii kepi siikasakech. ⁷Rii eecha wor:

“Eyey ma yen God riita kapasek boboyen bachi poyechiri,
God riita gamu poyeri,
ye sa inyaka kwoya hiki ta!

⁸Ma por riiti kapasek boboyen God riita eena abosuchiyega,
rii sa inyaka kwoya hiki ta.”

⁹Dii Devit riita kwoya hiki tawa majin wori, maba sapi diigii tawa ma yechaba kapo meejichi kwoya hikitu? Yaho. Maba sapi diigiinan biish tawa ma ye kwoya hikibato. Nota eecha wocho: Ebrahim rii God riina hiki siitiichichari, eena hechi rii nagwa nagwa ichawa maga eecha yar. ¹⁰Ebrahim rii shecha tarek, iin God rii nagwa nagwa ichawa ma wochar? Rii kapo mashi maba sapin diigiir? Kapo saka diigiitawak? Ayo. Rii sapi diigiinan biish tarek, God riita riina nagwa nagwa ichawa ma herek, eena yar. ¹¹Eecha tarek, maba sapin komas diigiir. Ebrahim rii biish tarek, rii God riina hiki siitiichicharek, God riita riina nagwa nagwa ichawa maga eecha yar. Yarek, rii riiti maba sapin diigiiri, sii eeta mukuchir, rii eeta nagwa nagwa tawa ma. Wowak, Ebrahim rii eeta eyey God riiti majin hiki siitiichichawa ma yechi wayega. Rii eeta maba sapin diigiinan biish tawa ma God riita yenya nagwa nagwa ichawa maga eecha yari, yechi wayega eeta Ebrahim. ¹²Ebrahim rii eeta maba sapin diigii ma yechi wayegaba. Yecha Ebrahim riita hiki siitiichichawa nobon sumowutar mashi maba sapi diigiirin, eena Ebrahim rii eeta yechi wayega. Ye sapin diigiiri, yi apoko saka otiichirek.

GOD RII EECHA WOR: EBRAHAM MII MIITI NEJAKA ADA KWONA NOSAP AKAREN HAKIITA

¹³Mashi God rii ebrahim riina wor: Komas ada miina miiti nejaka nosap akaren hakiita. Ebrahim riita God riina hiki siitiichichari God riiti misomak rii kepi tarek, eena saka lon sumowutarek, God riita riina akar nosapen haken worek. ¹⁴Ma ye lo majin sumowutawa, nobok God riita ma yenya hadabas boboyen haney, ma yechi, hiki siitiichichawa bobey eeta kubuchey boboy, God riita wochar maji eeta kubuchey tawa. ¹⁵Eeta

lo sii nona hadabas boboyen hakasakech. Sii God riita kwotay tawa boboyen nona eena hato. Wowak, ma ye lo majin meejinan biish tawey, ye lo majin nasowoyekasakech.

¹⁶Wowak, ada kawka kwona bak hiki siitiichichawa boboy sii God riita wochar maji siiti mu. Eecha tawak, eeta yesokwa yichi tawa boboy sii eyey Ebrahim riiti neja yechak yeyada yato. Saka lon hiki tawa ma yechabak yatawak, ma Ebrahim riita hiki siitiichirega eecha hiki siitiichichawa ma yen yabato. Ebrahim rii eeta noti eyey hiki siitiichichawa boboy apoko eena nota eecha wocho. ¹⁷God riita mashi keyir maji eecha wocho: “Ada miina otiichirek, mii eeta eyey ta ye i tawa ma yechi woyegasiir.” Diita wotar maji sii God riiti misomak eechaba eechaba kepi wey tawa. Diita God rii eeta harapa mayaka tawa. Rii eecha tawak har man rii otii saniyeechi, yesokwa yichi tawak, mashi biish tar boboyen apa rii wo otiiniga diita tawa.

¹⁸Mashi Ebrahim rii eeta nobon hekasakech. Rii tarek, rii hiki siitiichichi rii God riita wotar maji siita sokwaken eena kowutar. Worek, rii eena eyey ta ye i tawa ma yechi wayega siir. Mashi keyir maji eecha wor: “Miiti nejana nokwapa nokwapa siikiita.” ¹⁹Rii 100 sukwiya bana siirek, riiti maba eeta nejir. Worek, Sera, riiti mima sii apoko saba siirek, yikapwa kiyakasakech. Eecha tarek, Ebrahim rii riiti maban hikichi rii hiki siitiichichawa bobyen kwotayechi hiki tar. ²⁰God riita wotar majin rii saka abosuchirek, hiki siitiichicharek, anabeyechi tarek, God riiti hin yesokwatar. ²¹Rii harapa kwotayechi hiki tar God riita wotar majin riipa kiki siikiita. ²²Riita hiki siitiichicharek, eena God riita riina nagwa nagwa ichawa maga eecha yar.

²³Wowak, diita maji jeyek tawey, saka Ebrahim riitaban worek. ²⁴Nona kiki wobar. Jisas riita harek, God riita riina otii yesokwa yichirek, nota eena hiki siitiichichawey, eena God riita nona nagwa nagwa ichawa maga eecha yato. ²⁵Nota eyey kapasek boboyen otii tawak, God riita Jisas Kraist riina haken eena har. Harek, riina awasen yesokwarek, nota eena God riiti misomak kepi tawa.

GOD RIITA NONA EECHA HABATO NAGWA NAGWA ICHAWA MA

5 ¹Apa God riita riiti misomak hiki siitiichichawa nobok nota nagwa nagwa ichawa ma habato. Eecha tawak, eena nota Harapa Jisas Kraist riitaka eecha hehar tawa. God riita nona ow maji bakasakech.

²Jisas Kraist riita hiki siitiichichawa nobok nona yeechi nota God riita yeyada hatawa boboyek nota eeka riitaka chishitu. Eecha tanak, nota God riiti hadabas boboyen kowu tawak, noti inyaka kwoya hikitu! ³Nomo yatawa boboy notak yanan nota eena kwoya hikiba takiita. Nomo yatawa boboy siita noti sugu, wopun kiyatayeto. Kiyatayetawak, nota eeka hapaga siichi otiito. ⁴Hapaga siichi otii tawak, God riita hechawey, rii eeta kwoya

hecho. Riita kwoya hechawak, nota Jisas yak tawa nediin kowutu. ⁵Nota kowu tawak, nota meja maji bakasakech. God riita nona rukusii tawak, Holi Spirit nobok nota eeka meejito. Eeta Holi Spiriten God riita nona hato.

⁶Mashi nota saka hapaga siitarek, God riita hisiir nediik Kraist rii kapasek yo otiichi magiir chichar ma yenya Kraist riita hachir. ⁷Na hiki ta: ma por rii boy nagwa nagwa hiki tawa man hachikiita? Kapo ma por rii ma kepin hachikiita. ⁸Nago, nota kapasek tawa ma tarek, Kraist riita nona hachir! Eecha otiiri, eeta God riiti rukusii tawa boboyen, nona mukuchichu. ⁹Riita harek, apa God riiti misomak nota kepi tawa. Rii eeta otiichirek, no kepi tawak, eeta siiken nota God riiti kwotayi tawa boboyen no heechinak, non yesokwa yichikiita. ¹⁰Mashi nota God riiti ow ana pi ma tarek, eeta nediik Jisas riita harek, nona otiiniga God riiti nareboy sowa. Harek, nareboy sowak, eeta siiken riita tawak, nona yesokwa yichikiita. ¹¹Ada kawka bak, noti eena kwoya hikichi God riiti hin yesokwato.

ADAM MAJI KRAIST MAJI

¹²Ma por rii tarek, riitaba kapasek boboyen diita nosapek yayar. Yayarek, ha tawa boboyen yayabar. Yayabarek, eyey ma ye diita nosapek tawey, kapasek boboyen otii tawey, ye eena habato. ¹³Wowak, eeta nedii lo maji saka diita nosapek yatarek, ma ye kapasek boboyen otiitar. Otiitarek, lo biish tarek, God riita ma yecha otiitar kapasek boboyen eena hechi abosuchi tar. ¹⁴Adam ri nedii heechi i i Moses riiti nedii eyey ma ye hatar. Ma kaw ye Adam riita God riiti majin nasowoyechi otiirega, saka eechaba otiirek, wowak, ha tawa boboy sii eynya lagiir poyebatar. Adam rii eeta komas yak tawa ma riiti mayi mukuchir ma.

¹⁵Wowak, piir chegiik takasakech. God riita yeyada hatawa boboy sii Adam riiti kapasek tawa boboyeka piir eecha chegiik podabak takasakech. Eeta siiken podar ma riiti kapasek boboyek nokwapa nokwapa ma ye hatar. wowak, God riita harapa rukusii tarek, nokwapa nokwapa man rii riiti yeyada boboyen Kraist Jisas riiti nobok hatar. ¹⁶God riita yeyada ha tawa boboy sii ma por riiti kapasek boboyega eecha takasakech. Diita ma por rii kapasek boboyen otiirek, God riita anaseechi eecha wor: “Ma ye eeta sii siiken siikiita. Wowak, eecha tawak, God riita yeyada yenya haterek, rii eecha wochar kwo eeta kepi tawa!” ¹⁷Eeta siiken ma por rii kapasek boboyen otiiri, ha tawa boboy sii man tasiichi lagiir poyetar. Wowak, Jisas Kraist riita harek, God riita yeyada ha tawa boboy sii sokwa eeta harapa mayaka siir. Siirek, eyey ma ye eena eyey yari, riiti yeyada ha tawa nagwa nagwa otii tawa boboyen yari, ye Kraist riitaka eechaba eechaba siitii kowu takiita.

¹⁸Wowak, nota eena eeta hecho: ma por rii kapasek boboyen otiiri, nota eeta eyey sii siiken sowa. Eecha tawak, ma por rii yo kepi poren

otiiri, eyey ma eeta kwoya woy hiki tawak, nota eechaba eechaba takiita. ¹⁹Eecha wochawak, ma por rii boboy kapaseken otiiri, nokwapa nokwapa ma eena kapasek boboy otiito. Ma por rii God riiti nobon nagwa nagwa sumowu ichari, nokwapa nokwapa ma yen God riiti misomak eeka otii kepi siikiita.

²⁰Eeta lo maji sii yarek, kapasek boboy sii eechaba sokwa harapa mayak siir. Siirek, God riiti rukusiichi yeyada hatawa boboy sii sokwa eechaba harapa mayaka siir. ²¹Eecha tawak, kapasekeka tawa boboyen siitii kowu tarek, ma ye hatar. Wowak, God riita rukusiichi yeyada ha tawa boboy sii nona nagwa nagwa ichawa nobok heechi tawak, nona siitii kowutu. Siitii kowutawak, Harapa Jisas Kraist riiti nobok noa eechaba eechaba siikiita.

NOTA JISAS KRIAST RIITABAKA EECHA TAWA

6 ¹Eena nopa shechapa bakiita? Nopa boy mashi nobobak kawka tanak, God riita rukusiichi yeyad ha tawa boboy sii nona boy kapo nokwapa nokwapa mukuchitakiita? ²Yaho. Sii siiken. Nota harek, kapasek boboy otii tawa nobon nota heechir. Boyewak nota kawka kapasek boboyen otiikiita? ³Kwo hikitu: nota Jisas riitaka eecha uku yeetiiri, ii eeta no podat nobobak siirek, riitaka har. ⁴Notu uku yeetiiri, ii riitaka eecha nota tiiriimok chir. Chirek, riitaka eecha har. Apa boyewak? Jisas Kraist riin tiiriimok heechi God riiti hadabas hapaga boboyek saniyeechi yesokwarega, nota eechaba sokwanak kepi wey takiita.

NOPA MESEK KRAIST RIITAKA EECHA TAKIITA

⁵Nota riitaka eecha hayega, podak tanak, riita harek, riin saniyeechi yesokwarega, nopa eechaba riitaka ya sokwanak, podatiibak takiita.

⁶No eecha hikitu: noti kapasek nobo siin eeta Kraist riitaka eecha mek ji siitiichir. Kapasek otii tawa hapaga boboy siina pi sowakwo hamaken eena mek ji siitiichir. Mek ji siitiichirek, nota kapasek boboy siiti yo otii wakasa makasakech. ⁷Ma ye hanak, kapasek tawa boboyen yechaka eecha heemar.

⁸Nota Kraist riitaka eecha hari, nota eena hikitu no riitaka eechaba takiita. ⁹No eecha hikitu Kraist rii tiiriimok awasen saniyeechi ya sokwarek, kawka saka hakiitawak, kapasek tawa hapaga boboy sii eeta riina siitii kowukasakech. ¹⁰Riita hari, kapasek boboy siin eeta pi hamar. Apa rii tawa. God riitaka eechaba eechaba takiita. ¹¹Eecha tawey, eechaba na hiki ta. kwota kapasek yo ichawa nobo eeta hamar. Kapasek boboy sii nona otii hechaney, no mayishikasakech. Kwo Jisas Kraist riitaka God riitaka eecha siito.

¹²Ii kapasekeka tawa boboy sii kwona siitii kowu ma siikasakech. Eena kwo opoche kwoti maba siiti nobon sumowutanakech. ¹³Kwo opoche

kwoti maba kawen hanak, kapasek otiitanakech. Wowak, kwota na eyey mabak tawa boboy kwotin God riitaban ha. Kwota na kwoti eyey maba boboyen abosuchi heechi nagwa nagwa God riitabak i. Tiirimon heechi yesokwa tawa maga na eechea i. ¹⁴Kapasek boboy sii kwona siitii kowukasakech. Lo maji sii kwona siitii kowu takasakech. God riita rukusiichi yeyada ha tawa boboyek eeka kwona siitii kowutu.

NOTA EETA NAGWA NAGWA NOBOK ICHAWA WAKASA MA

¹⁵Wowak, nopa shecha otiikiita? Nota on heechi God riita rukusiichi hatawa boboy siita nona siitiikowu tawey, nopa boy kawka kapasek boboy otiikiita? Yahoo! ¹⁶Kwo eechea hikitu: kwota ma por riiti majin meejichi sumowuney, ii eeta riiti yo otii wakasa ma siiken sowa. Nago, kwo kapasek boboy siiti yo otii wakasa ma siiney, ii kwopa hakiita. Kwota God riitaban sumowuney, ii kwopa God riiti misomak kepi takiita. ¹⁷Mashi kapasek boboy siiti kuruk eeka tar. Apa kwo pokiitawa maji kepin sugu wopuk heechi eena sumowutu. Eena ada God riina woshiato. ¹⁸God riita kwona kapasek boboy pokok jicharin heemachi yaya boboy kepin otii wakasa ma heechir. ¹⁹Ada batawey, kwoti sugu wopu sii saka kiki siitawak, eena ada ma otii tawa abon wocho. Mashi kwo kwoti maban eyey boboyen kapasek boboy siitaban hatar. Hatarek, kwo een kapasek otiir. Apa kwo na eye maba kwi God riitaban hanak, riiti boboy kepi siiti yo otii wakasa ma na siinak, holi boboyeban na otii ta.

²⁰Mashi kwota kapasek boboy yechi kuruk tari, God riiti nagwa nagwa ichawa nobo kwota ikasakech. ²¹Mashi kwota tar nobo sii kwona kapasek boboyen otiiterek, kwo boboy kepin boyega shecha yatar? Eeta yikadey boboy sii eeta ha tawa nobo. ²²Wowak, apa God riita kwona kapasek boboy tar pokon heemachir. Heemachirek, apa kwo eeta God riiti yo otii wakasa ma siir. Siirek, apa kwota eyey boboy kwotin riitana har. Harek, kwo eecheba eecheba siikiita. ²³Kapasek otii tawa boboy sii eeta hatawa nobon tokoto. Wowak, God riita yeyada ha tawa boboy sii eeta nona Jisak Kraist, noti Harapa, riitaka eecheba eecheba takiitawa nobon eena hato.

NOTA AKAR NOBOK ICHU

7 ¹Yaka kumwoy, ada bana maji kwota hikitu. Kwo lo majin meejito. ²Maka eechea tawa mima sii sa ma riitabaka eechea ta. Wowak, riita heechi hanak, lo eeta mima siin neekikasakech. ³Wowak, siita siiti ma rii tanak, sii heechi akar man siiney, siina eechea habakiita nobo anemesheroko tawa mima. Wowak, siiti ma rii haney eeta lo siina anachekekasakech. Siita akar man siiney, sii kapasek siikasakech. ⁴Kwota, eejii kumwoy, eecheba tawa. Lo siiti majik, kwo eeka har. kwota Kraist riiti mabaka tawak, eena kwo har. Kraist riita harek, riin saniyeechi awasen yesokwarek, no eeta riiti tawa. Tawak, nota na kepi

tanak God riiti yo kepin otii ta. ⁵Nota mashi kapasek boboy yeechi kuruk tari, lo maji sii nona kapasek otiitar inyakan eena yesokwar. Yesokwarek, nota eeta ha nobok eeka ichar. ⁶Mashi eeta llo sii nona poko jichar. Wowak, apa nota harek, eeta lo sii nona neekikasakech. Eena lo sii nona anachekekakech. Apa nota Spirit riiti nobon sumowutu. No mashi keyir majiban sumowukasakech.

KAPASEK BOBOY SIITI NOBO SII NONA KAPASEK OTIITO

⁷Eena nopa shechapa bakiita? Lo sii boy kapasek otiito? Yahoo. Wowak, lo siita nona mukuchinan siiyega ada waga boyega siina shecha hikiwa? Lo siita ana eeche wonyan siiyega, opoche mii kowya hechanakech, ada waga eena boyega shecha hikiwa? ⁸Diita lo maji yarek, ada nokwapa nokwapa kapasek otii tawa nobon her. Ada nokwapa nokwapa boboyen kwoya hechar. Ayo. Lo biish teyega kapasek boboy sii waga biish sowa. ⁹Mashi lo biish tari, ii an tar. Lo sii yarek, kapasek boboy sii geenyik sokwarek, ada eeta har. ¹⁰Lo majin sii man yesokwaken sokwari, an eena heri sii eeta ana pi sowakwoken otiir. ¹¹Kapasek boboy sii otii nobon yeshatari, diita lo sii otiitar nobon hechi iibak otiir. Otiitari sii ana woshepiitar. Eecha otiiterek, kapasek boboy sii ya ana pi sowakwor. ¹²Eena eeta lo sii eetahoi, kepi taw. Eyey siiti maji sii eeta holi, nagwa nagwa tawa ichawa nobo, eeta kepi wey tawa.

¹³Diita maji mu kapo eeche wocho boboy kepi sii ana pi sowakwor? Yahoo. Kapasek boboy siita pi sowakwor. Kapasek boboy sii boboy kepi yeechi otiichi ana pi sowakwor. Worek, kapasek boboy siiti mu geenyik ya sokwarek, no hehar hecho. Eeta yikadey boboy, lo siiti nobok ya sokwarek, kapasek boboy sii eeta kapasek wey.

KAPASEK BOBOY SI NOBO NOTI INYAKAN POKOGA JICHU

¹⁴Nota eeche hikitu lo sii eeta God riiti spiriteka eeche tawa boboy. Wowak, ada diita nosapek tawa maba omuka tawak, kapasek boboy siita ana poko jirek, ada siiti yo otii ma siir. ¹⁵Wowak, ada otii tawa mun hikikasakech. Boyewak ada otiito? Ada otiik otii tawa boboyen an way otiikasakech. Wowak, ada yuya tawa boboyen eena an otiito. ¹⁶Ada yuya tawa boboyen otiinak, ada eeche wocho, “Lo eeta kepi tawa.” ¹⁷Wowey, dii ada otiikasakech, kapasek boboy siita adaka tawak, otiito. ¹⁸Ada ma sobo tawey, eeta boboy sii ana kepikasakech. Eecha tawak, ada yo kepin otiiken otii tawey, boyega shecha otiik? ¹⁹Ada otiiken otii tawey, boboy kepin otiikasakech. Wowak, kapasek boboyen ada yuyeechi otiito. ²⁰Ada kapasek yon yuyeechi otiiney, dii eeche wocho an otiikasakech. Kapasek boboy siitaba adaka tawak, siitaka eeche otiito.

²¹Wowak, an hecho eeta boboy sii eeta yo otiito. Ada yo kepin otiiken otii tawey, ada kapasek boboyen otiito. ²²Eeji sugu wopuk ada God riiti

lon otiiken hikitu. ²³Wowak, anadii lo sii eeji mabak otiito. Diita lo sii sugu wopuk tawa lo siitaka eeche ow ana pichu. Eeche mabak otii tawak, kapasek boboy tawa lo sii ana poko jichu. ²⁴ada kapasek wey siito. Diita maba sii ha tawa nobok ichawey, kapa nama ana kwoyava yeechikiita? ²⁵Ada Jisas Kraist, noti harapa, riiti hik God riina woshiato. Riita ana kwoyava yeechik. Wowak, ada diika tawa: ada eeji inyakabak hikitu an God riiti yon otii tawak, maba sobo tawa boboy sii kapasek boboy siiti yo otii nobon sumowutu.

KRAIST RII KAPASEK BOBOYEN KWOYAVA YEECHI SPIRITEN HEECHIR

8 ¹Wowak, apa ma ye Kraist riitaka eeche tawey, anasakasakech. ²Spirit siiti lo sii ana Jisas Kraist riitaka eecheba eecheba tawa boboyen hatawak, sii hatawa kapasek boboyeka tawa lon ana heemachir. ³Ma ye maba omuk eeche tarek, ma kiiriisiiposii tarek, lo sii eena kikisiikasakech. Eeche tarek, God riita otii. Riita riiti yikapwa podareban heechirek, yar. Yari, rii ma sobo tar boboyega eeche siir. Siirek, ma yechi kapasek boboyen kwoyava yeechiken eena yar. Yari, God riita Jisas Kraist riitak ma yecha kapasek otii tar boboyen rii dagiir poyer. ⁴God riita eeche otii tarek, lo siita yeechi yayaken otiitar boboy, ma nagwa nagwa sii boboy sii notaka hehar sokwataken eena otii. Riita otiiri, Spirit riiti nobok eeke otii. Ma yecha otii tawa aboga eeche otiikasakech.

⁵Ma ye maba omuk tawa boboyen sumowu tawey, yechi maba omuk tawa boboy sii eeta yechi inyakan siitii kowutu. Ma ye Spiriten sumowu tawey, eeta Spirit riita yechi inyakan siiti kowutu. ⁶Maba omuk tawa boboy sii inyakan siitii kowu taney, ma riipa hakiita. Spirit riita inyakan siitii kowu taney, eeta ma riipa eecheba eecheba kepi hikiniga takiita. ⁷Ma rii riiti maba omuk tawa boboyen sumowutaney, rii eeta God riina ow ana pichawa ma. Rii God riiti lo nobon sumowukasakech. Ii saka kiki siikiitawak. ⁸Maba omuk tawa boboyen sumowu tawa ma yen God riita kwoya hekasakech.

⁹Wowak, kwo maba siiti nobok takasakech. Spirit rii kwotaka eeche yichaney, kwo eeta Spiriteka eeche tawa ma. Eeta ma por rii Kraist riiti Spiriteka eeche tanan siiney, ii riitikasakech. ¹⁰Kapasek boboy sii kwona otiichirek, kwi maba eeta har. harek, Kraist rii kwotaka eeche taney, ii kwo eeta God riiti misomak nagwa nagwa tawa. Tawak, eeta Spirit rii kwona tawa. Tawak, eeta Spirit rii kwona otii verechichawak, kwo eeta kepi wey tawa. ¹¹God riita Jisas Krasit riita harek, riina otii saniyeechi yesokwar. Riiti Spirit rii kwotaka taney, iipa Jisas Kraist harek, rriina otii saniyeechi yesokwar. Riiti Spirit rii kwotaka taney, iipa Jisas Kraist harek, rriina otii saniyeechi yesokwarega kwoti ha tawa maban otiiniga yesokwachibakiita. Riiti Spirit kwotaka eeche tawey, rii eeche otiito.

SPIRIT RII NONA OTIINIGA GOD RIITI YIKAPWA SIIR

¹²Eena yaka kumwoy nota awasen ha boboy tawey, maba omuk otiwa tawa boboyen awasen ha boboyekasakech. ¹³Yaho. Kwo maba omuk tawa boboyen sumowu taney, ii kwopa hakiita. Kwo Spiriten sumowuchiniga kwota yo kapaseken Spiritek lagiir poyetaney, kwopa eechaba eechaba kepi takiita. ¹⁴Eeta eyey ma ye God riiti Spiritek chishitaney, ye eeta God riiti yikapwa tawa. ¹⁵Eeta Spiriten God riita kwona hari, kwo akii tawa yo otii wakasa ma siikiisakech. Yaho. Eeta otiichichawak, kwo eeta God riiti yikapwa sowa. Yikapwa siichi tawak, Spirit riiti hapaga boboyek eeka nota God riina uwato: “Apoko, eejii Apoko!” ¹⁶God riiti Spirit riita noti spiriteka eeche parechi eeche wocho: “Nota God riiti yikapwa.” ¹⁷Nota God riiti yikapwa tawey, komas nota riiti boboyen yabakiita. Kraist riita yak tawa boboyen Apoko rii apa eena siiti kowu tawey, eena nota Kraist riitaka eeche yabakiita. Nota riitaka kiki chishi tawak, kapa kiki meeji tawey, riiti hadabas boboyen nota kiki yakiita.

KOMAS NOTA GOD RIITI HADABAS BOBOY KEPIN YAKIITA

¹⁸Ada eeche hikitu diita kapa meeji tawa boboyen apa nota kiyatawey, eeta kubuchey boboy. Komas God riita nona geenyik mukuchik tawa hadabas boboy sii eeta harapa. ¹⁹Eyey boboyen God riita otiirek, sii eena kowutu. God riita riiti yikapwa yenza riita otii boboyen geenyik kwodii wo mukuchiken eena kowutu. ²⁰God riita otiir boboy sii God riiti boboy siiken siin saka hechawak. Ii yechi yokasakech. Ii God riiti inyaka tawa yo. Wowak, sii sokwak tawa nediin eena kowutu. ²¹God riita diita nosapek tawa otiir boboy eyey sii eeta kwopa siito. Eeche tawak, siin poko jiniga tar. Jiniga tawak, sii eeta heema nediin kowutu. Eeta nedii yanak, sii God riiti yikapwa yechaka eeche kepi wey siikiita. Kwopa siikasakech.

²²Kwota hikitu eyey boboyen God riita diita nosapek otiiri, sii kapameejik otii tawey, mimayikapwa yimowuken otii tawak, kapa meeji tawaga eeche meeji. ²³God riita otiir boboy siitabakowukasakech. Nota eechaba kowutu God riita riiti Spiriten nona mapo hari, notaka eeche tawak, noti inyakak visuwutu. Nota God riita nona riiti yikapwa siiken otiichiken, nota kwopa siitii tawa boboyen heemachiken eena kowu tawak visuwutu. ²⁴Nota kowu tawak, nona yesokwa yichikiita. Nota kowu tawa boboyen heneyey, nota eena kawka kowukasakech. Kapo nama riita hewa boboyen kawka kowu takiita? ²⁵Wowak, nota henyan sobo tawa boboyen kowu taney, nota kiya yaniga kowu takiita.

²⁶Eeta Spirit rii ya nona kiyatayebato. Nota arobaro tawey, Spirit rii nona kiyatayeto. Nota God riiti yikapwa tawey, eeta Spirit riita nona visuwuchi kuruk bachichu. Kujak banan siir maji eena eeta Spirit riita kuruk

bachichu. ²⁷God riita ma yechi inyaka wopun hecho. Hechawak, Spirit rii God riiti inyakan God riiti ma mima yenya wosyasachiyasa hechichu.

²⁸Wowak, no hikitu eeta ma ye God riina rukusii tawey, eeta ma yen God riita hisiichi yon hari, eyey yenya ya tawa boboy sii yenya kiyatayechichu. ²⁹Eeta ma yen God riita hisiiri, ye sokwa riiti yikapwaga eeche siiken eena rii yeechi saniga yichir. Yichi tawak, ye God riiti Yikapwa riiti kumwoy siikiita. ³⁰Ada kawka wocho eeta ma yen God rii yeechi saniga yechi tawey, yenya rii habatar. Habatarek, rii riiti misomak yenya oti nagwa nagwa tar. Tarek, ye riiti hadabas boboy kepin yenya habar.

GOD RIITI RUKUSII TAWA BOBOY SII YENYA HEECHIKASAKECH

³¹Eena nopa shechapa bakiita? God riita nona kiyatay tawey, kapo nama nona yabu pi ma? ³²Na he! Riita riiti Yikapwan egesiikasakech. Riita heechirek, yari, nona kiyatayeken eena yar. Riita Yikapwan nona kiyatayeken hari, riipa kapo nona riiti akar boboyen saka kapo habakiitawak? Yahoo. Riipa eyey boboyen habatakiita!

³³Kapo nama God riiti ma miman kapasek majin ba diimakiita? God riita yenya eeche wocho: ye kapasek boboyekasakech. ³⁴Nama kapo yenya dagiir poyekiita? Yahoo. Jisas Kraist rii harek, riina yesokwa yichirek, rii God riiti mama yepa tapak yichu. Yichiwak, riita God riina nona anasa majin eena wo wohecho. ³⁵Wowak, kapo boy boboyek Kraist riita rukusii tawa boboy sii nona kwoyava yeechikiita? Kapo nomoya tawa boboyek, kapo harapa yok, kapo nona kikir poy boboyek kapo eeche ha tawa boboyek, kapo kiiriisiiposi siinakech, kapo pinyakech akiitanak, kapo ha tawa boboyen akiitanak nona Kraist riita rukusii tawa boboyek nona kwoyava yeechikiita? Yahoo. ³⁶Mashi keyir maji sii eeche wocho,

“Nota miiti ma mima tawak,
eena eechaba eechaba nedii nona pi hato.
Ye nona hechawey, sipsip yiga eeche
pi sowakwoto.”

³⁷Ayo. Diita boboy notak yaney, notapa dagiir poyekiita. Jisas Kraist riita nona rukusii tawa nobok nopa eeka dagiir poyekiita! ³⁸⁻³⁹Ada eena hehar hecho akar boboy pochi sii nona Kraist riiti rukusii tawa nobo nona ya kwoyava yeechikasakech. Ha boboyek, tawa boboyek, egelek, siitii kowu tawa boboyek, apa tawa boboyek, komas yaka tawa boboyek, howuk tawa boboyek, heyik tawa boboyek, akar boboyek nona sakapa God rukusii tawa boboyek taweyn kwoyava yakasakech. Diita hapaga boboyen Jisas Kraist, noti Harapa, riita otiirek, eena eeta noti.

GOD RIITI MA MIMA

9 ¹Eeji diita maji an sikken wocho. Ada Kraist riiti. Ada saka woshepii tawak. Holi Spirit rii ana siitii kowu tawak, eeji inyaka sii eeche

wobatoada woshepiikasakech. ²Ada eejii ma mima, eeta eejii pi eejii maba omu, yenya hiki tawey, ada harapa inyapwan hiki tawak kapa meejiito. ³Nobo taney, ada God riina wohenyak, God riita ana otiichinyak, ada ha tawaeemek inyak, eejii yaka kumwoy ye sapa eeka kepi sokwa. ⁴Yecha God riita hisiir ma. Riita otiichirek, ye riiti yikapwa siir. Siirek, rii riiti boboy kepin yenya habatar. Rii wotar majin yenya wobar. Riitilon yenya har. Yecha God riiti hin yesokwahechar. God riita boboy kepin yenya haken wori, ye meejiir. ⁵Yechi wayega eeta Ebrahim, Aisak, Jekop. Kraist rii sokwa mak siiri, rii Ju mak sokwar. Eetakepi wey. Eyey boboyen siitii kowu tawa God riiti hin na yesokwa ta. Amen.

GOD RII RIITI MA MIMAN HISIIR

⁶Ada saka batawak, God riita wota hipir. Yaho. Eyey Isrel ma siiken bakasakech. ⁷Eyey Ebrahim riiti neja ye God riiti yikapwakasakech. God riita Ebrahim riina eecha wor: “Aisak riiti yikapwayechaba eeta miiti yikapwa.” ⁸Diita maji mu eecha wocho: eetayikapwa ye sobo sokwa tawey, ye God riiti yikapwakasakech. Yaho. God riita wotar majik yimowu tawa yikapwa ii eeta God riiti yikapwa. ⁹God riita wotar maji eecha wor: “Eeta nediik ada awasen yanak, Sera siipa hoye yikapwa por yimowukiita.”

¹⁰Apa an maji kawka tawa. Rebeka sii yikapwan upurusen yimowuri, apoko podareba. ¹¹⁻¹²God riita diita boboyen riiti inyakak otiiken otiiterek, ma yechi boboy takasakech eena rii eecha wor: “Yaka riipa kumwoy riiti kuruk takiita.” God riita wor nedii yikapwa piiriina saka yimowu tarek, worek. Piirsaka kepi boboy otii tarek, kapasek boboyen otii tarek, rii wor. Wowak, boyarek God rii hisiir? Riiti inyakak saniga hikir. Piiriita hikichi otii tar yon saka eena hisiirek. ¹³Mashi keyir maji eecha wocho, “Ada Jekop riina rukusii tarek, Iso riina yuyatar.”

¹⁴Eena nopa shecha bakiita? God rii boy kapasek boboyen otiito? Yaho. ¹⁵Rii Moses riina eecha wor: “Adama poren rukusiichi yeyada haken wonyey, anapa hakiita. Ma por riin ada inyapapwa hikichi haken wonyey, anapa hakiita.” ¹⁶Wowak, nota hecho God riita otii abo sii eeta riita hikichi rukusii otii tawa boboy. Ma yecha otiiken hiki tawa boboy sii takasakech. ¹⁷God riita mashi keyir maji sii Pero riina wor: “Miina eejii hapaga tawa boboyen mukuchiken, eena ada miina aka tabo yima otiichi heechir. Eejii hin eyey nosapek meeji ye i taken eena ada miina eena aka tabo yima otiichir.” ¹⁸Nago, God riita ma poren hehar rukusiik wonyey, ii riipa keena otii mabiya giiken wonyey, riipa otii giikiita.

GOD RIITI KWOTAY BOBOY RIITI RUKUSIICHI YEYADA HA TAWA BOBOY

¹⁹Wowak, ma por rii kwotaka tawey, kapo eecha wokiita, “Diita maji siiken taney, boyega God riita shecha hikitu ma ye kapasek tawa?

Kaponama awasen God riiti inyakan bato?” ²⁰Wowak, ada awasen wocho, eeji nareboy, mii nama kapo God riina awasen bato? Ma por rii awon chichawey, awo sii riina maji eeche wokasakech, “Boyewak miita ana eeche otiwa?” ²¹Ma por rii nosap pochin yeechi awo upurus chinyey, awopochi yo kepin otii tawa awo, pochi sii yo kapaseken otii tawa awo, riiti inyakak hikichi chichawey, eeta kepiisa keena otii.

²²God riita eecheba otii tar. Rii ma yenza riiti kwotay tawa boboyen riiti hapaga tawa boboyen geenyik mukuchiken hiki tar. Nokwapa nokwapa ma yenza God rii yuya kwotayererek, ye kapasek tarek, God riita yenza pi sowakwo hamaken eena sayar tarek, rii kowu ye yayatar. ²³God riitariiiti hadabas boboyen ma yenza geenyik yesokwa mukuchiken hiki tar. Hiki tarek, rii riiti hadabas boboyen nota yaken eena nona sayarechichar. Riita nona sayarechicharek, rii nona rukusiichiniga riiti hadabas boboy kepin notaka gwotii powur. ²⁴Eeta notaba. Riita nona uwarek, yar. Ju ma kaw yechaban uwakasakech. Shebo shebo tawa ma kaw yen uwabatar.

²⁵Hosia riita keyiri, God riita eeche wor:

“Eeta ma mima yenza eeji wonyan siiri,
ada eeche habato, eejiyiba.

Eeta ma mima yenza ada saka rukusiiterek,
apa ada yenza rukusiito.

²⁶Eeta akaman ma mima yenza ada eeche wori,
eeji yikasakech,
eeta akama ma yenza eecheba eecheba tawa
God riiti yikapwa siiken haba takiita.”

²⁷Aisaia rii Isrel ma yenza eeche wor: “Isrel ma yecha somakwotii tawa pak tawa kesinega eeche taney, iipa kaweban yesokwa yichikiita. ²⁸Ayo, Eeta Harapa riipa ameya anasanak, boboy awasen hakiita.” ²⁹Aisaia rii mashi eeche wor: “Eeta hapaga tawa Harapa rii riiti nejan otiinan siiyega, nota waga Sodom akamak tawa maga, Gomora akamak tawa maga eeche sowa.” (Yechi akama harapa hi sokwar.)

ISREL MA YE EECHABA EECHABA TAK TAWA BOBOYEN YAKEN YO YATAR

³⁰Eena nopa shecha bakiita? Diitata. Eeta shebo shebo tawa ma ye nagwa nagwa ichawa nobon yesha he otiikasakech. Wowak, God riita yenza hiki siitiichichawa nobok God riiti misomak nagwa nagwa otiichir. ³¹Wowak, God riita hisiir Ju ma ye nagwa nagwa otii tawa lon sumowu ichar. God riiti misomak ye kepi siiken eena sumowu ichar. Sumowu ichari, ye nagwa nagwa siikasakech. ³²Boyewak? Yecha otii tawa boboy yechi mu ii sii eeta yo. Sii eeta hiki siitiichichawa boboyekasakech. Ye i papak yatiima oborokochi sakatar. ³³Mashi keyir maji sii eeta papan maji geenyik wor. Eecha wor:

“Na he. Ada papa pochin Saion akamak yichir.
 Yichirek, ye i yatiima oborokochi sakatakiita.
 Yichir papa por man otiichinyak sakaken
 otiiken eena heechir.
 Wowak, eeta ma rii eeta papa riina hiki siitiichichaney,
 riipa hiibiya sakapa yakiitawak.”

**EETA ISREL MA YE GOD RIITI NAGWA NAGWA
 TAWA BOBOYEN YAKASAKECH**

10 ¹Eeji yaka kumwoy, eeji ma mima, Iarel yenya, God riita yeechi yesokwa yichiken ada eena gegi yato. Ada yenya God riina eechaba eechaba nedii wohe maji bachichu! ²Ada keena kwona sawotakiita. Ada oti hecho: yecho God riiti nobon sumowubaken ye harapa gegin yatar. Wowak, yecha ichawa nobon eena sobo yo yato. ³Yecha God riita manotii hehar yichi tawa nobon eena hehar hekasakech. Yecha akar nobon takari, ye eeka ichar. Eecha otiirek, yecha God riita man nagwa nagwa kepi wey otiitawa nobon eena rukusiichi sumowukasakech. ⁴Kraist rii lon otii hamarek, rii eyey riina hiki siitiichichawa ma yenya God riiti misomak otii kepi siir.

GOD RIITA EYEEY MA MIMAN YAKEN HIKITU

⁵Moses rii eeche keyir eeta ma rii God riiti misomak nagwa nagwa kepi siiken lo eeka sumowuken otiitawey, rii sapa lon hehar sumowu ta. ⁶Wowak, ada hiki siitiichichawa nobok nagwa nagwa ichawa hi kepin majin ada sawoto: “Kwo opoche kwoti inyakan mayama batanakech; Nama kapo hevenek iniga Kraist riina yeechi yayakiita? ⁷Opoche eeche batanakech: Nama ha tawa eemek iniga Kraist riina yeechi yayakiita?” ⁸Diita maji eeche wocho: “God rii sawo tawa maji sii eeta kwotaka eeche bana bana tawa. Kwoti kujaktawak, sugu wopuk eeka tawa.” Diita hiki siitiichichawa majin sawoto. ⁹Miita miiti kujak eeche wonyey, “Jisas rii eeta Harapa,” miita miiti sugu wopuk eeche hiki siitiichinyey, Jisas riita harek, God riita riina awasen yeechi yesokwa yichir, eeche hikiney, God riipa miina yesokwa yichikiita. ¹⁰Notanoti sugu wopuk Jisasriina hiki siitiichichawey, God riiti misomak nona nagwa nagwa otii chichu. Nota Jisas Kraist riiti hinnota kwodii wochiwak, nona yesokwa yichitu.

¹¹Eetamashi keyir maji eeche wocho: “Ma ye riina hiki siitiichinyey, riipa kapasek boboy saka takiitawak.” ¹²Diita maji eeche wocho Ju ma shebo shebo tawa ma saniga saniga takasakech. God riita eyey man siitii kowutu. Siitii kowu tawak, riita eyey riina wohechawa ma yenya harapa hadabas boboyen hato. ¹³Mashi keyir maji eeche woch: “Eyey ma ye Harapa riiti hin uwatawey, yenyapa yesokwa yichikiita.”

¹⁴Yecha riina hiki siitiichinyan siiney, boyegapa shecha riina uwatakiita? Yecha sawo tawa majin meejinan siiney, boyega shecha hiki siitiichichu?

Yecha sawo tawa majin meejinan siiney, boyega shecha hiki siitiichichu? Eeta maji siina sawo tanan siiney, ma boyega shecha meejito? ¹⁵Maji sawo tawa man heechinak inyan siiney, boyega shecha majin sawoto? Mashi keyir maji eeche wocho, “Majin ye ichawa ma yechi yatii eeta kwoya hecha wey.”

EETA ISREL MA YE HADABAS MAJIN SUMOWUKASAKECH

¹⁶Yecha eyey eeta majin sumowukasakech. Aisaia rii eeche wor: “Harapa nama kapo nota sawo tawa majin hiki siitiichichu?” ¹⁷Wowak, Kraist riiti majin sawo tawey sii eeta i ye yato. Ma yecha eena meejii tawey yecha hiki siitiichichu.

¹⁸Wowak, ada eena wohecho: Kapo eeta siiken yecha majin saka meejirek, Yahoo. Yecha meejir. Mashi keyir maji eeche wocho:

“Yechi aya eyey nosapek i ye yar.

Yechi maji sii eyey eemebak i ye yar.”

¹⁹Ada kawka wohecho: Eeta Isrel ye diita majin kapo saka meejirek? Yahoo. God riita Moses riitak eeche wor:

“Anapa shebo shebo tawa ma miman yeechi boboy kepin ada yenza otiichinyeyen kwopa eena inyaka kapasek hikichi kwotayekiita.”

²⁰Wowak, God riita otiichirek, Aisaia rii anabeyichi siitii wor:

“Ana yesha henyang biish tawa ma ana he hamar. Ana wohenyan biish tar ma yenza ada geenyik ya sayarek, ye her.”

²¹Ada Isrel yenza majik tawa. God rii eeche wor, “Ada yenza eechaba eechaba nedii tapan seechi tari, ye eena hechi wosowoyechi tar.”

GOD RIITA ISREL MA KAW YENZA YEYADA RUKUSHIICHI HATAR

11 ¹Eena ada wohecho: God riita kapo riiti ma miman bokona poyer? Yahoo. Bokona poyekasakech. Ada eeta Isrel maba. Eeta Ebrahim riiti neja. Bensamin riiti neja. ²God riita baka baka nediiik hisiirman rii bokona poyekasakech. Kapo kwo hikitu God riiti majin Ilaija rii sawo tawey, Ilaija rii Isrel yenza anasaken God riina wohecho. Rii riina eeche woher: ³“Harapa, yecha miiti piirapet yenza pi sowakwo hamar. Yecha miiti opelen otii tar cheyen dagii rabor. Adaba saniga taweyn, ye ana pi sowakwoken otiito.” ⁴Wowak, God riita kapo yenza awasen shecha wor? Rii eeche wor: “Ada 7,000 man hisiichi heechi tawey, yecha Beal, woshepii tawa goden, riiti hin saka yesokwa tarek.”

⁵Eechaba tawak, apa God riita ma kawen rukusiichi hisiiri, ye tawa.

⁶God riita yenza hisiiri, yecha otii tar yon rii saka hecharek. Riiriiti

inyaka rukusiichi yeyada hataweyn eeka eeta nobok hisiir. God riita ma otii tar yon hechi hisiiyega, riita yeyada rukusiichi ha tawa boboy sii siikenekasakech.

⁷Eena nopa shecha bak? Isrel ma ye yesha tar boboyen saka herek. Eeta karakada ma kawen God riita hisiiri, yechaba her. Anadii ma kaw ye God riita uwar majin meejikasakech. Mabiya giir. ⁸Mashi keyir maji eeche wochari,

“God riita otiihirek, yechi sugu wopu marenoku giitar.
Mashi nedii ya apa nedii yechi miy saka mey maka hechawak,
yechi mabiya saka meejitawak.”

⁹Devit rii eeche wocho:

“Yecha nokusha atawak, mayan heemachi
jichawaga eeche sa ji.
Yecha sa saka pishaman!

¹⁰Yechi miy sa niyik inyak mey maka hekasakech.
Nomo ya tawa boboy yechak yanak,
magiir sa eecheba eecheba reekii ta.”

GOD RIITA ANADII MA YENYA AWASEN YAKIITA

¹¹Wowak, ada wohecho: Ju ma ye sakari ye boy eyey saka hamar? Yahoo. Yecha kapasek boboyen otii tarek, eena yesokwa yichi tawa boboy sii anadii shebo shebo tawa ma yanya yar. Yarek, ye eeta boboy kepin yari, Ju ma ye eena herek, yechi inyaka kwotayetar. Eeche otiiken eena shebo shebo tar man yar. ¹²Ayo. Ju ma ye nobo kepin heechirek, eena anadii ma ye eeta boboy kepin yato. Ju ma ye Spiriteka tawa boboy kepin heechirek, God riiti hadabas boboy sii shebo shebo biish tar ma yechak yar. Eeche otii tawey, Ju ma yepa eeta nobo kepi kawkaw iken otii tanak, hadabas boboy kepi sii eeta nokwapa nokwapa maka yakiita.

¹³Apa ada anadii tawa ma kwona bato. Ada anadii tawa ma kwoti aposel yo otii tawak, eji inyaka kwoya hikit. ¹⁴Ada eeche otii tawak, kapo Ju ma mu kaw ye hechi inyaka kwotayechi inyaka dareboyenak, yanya yesokwa yichikiita. ¹⁵Ju ma yanya bokona poyerek, eeta nediik diita nosap ma ye God riiti nareboy siir. God riita Ju ma yanya kawka yayanak, ii kapo shecha siikiita Ha tawa ma ye eecheba eecheba siikiita! ¹⁶Ma ye mapo chir geyen God riina haney, eeta eyey gey eeta God riitiba. Ma ye me neejin God riita haney, me nawaba tapa eecheba eeta riiti.

¹⁷Nowok tar oliv me tapan kaw tiim yeechi yaya kwashek tar oliv me tapan tiim rabochi eedii jir. Jirek, eeta tapa sii neejik tar ukun ayey ichar. Anadii tawa ma kwo kwashek tawa oliv me tawaga eecheba tawa. Eeche tawak, kwo eena Ju ma yechi boboy kepin hapaga boboyen yato.

¹⁸Eeche tawak, eena kwo tiim rabor tapan opoche kapasek hikitanakech.

Kwo opoche wohiputanakech. Kwo tapabak tawa. Nenye siita kwona kiyatayeto. Kwota nenyen kiyatayekasakech.

¹⁹Kwota kapo apa eecha wokiita, “Ayo, wowak, God riita ana eemen kaw heechiken otiirek, eena rii oliv me tapan reekiir.” ²⁰Ayo. Eeta siiken. Yecha saka hiki siitiichirek, eena yenya reekiir. Kwota hiki siitiichichawey, eena kwo eeta tawa. Wowak, opoche kwo wohiputanakech. God riina napa akii ta. ²¹Ju ma yecha eeta me tapa siiken tarek, God rii yenya rabor. Kwo diita me tapa siikenekasakech. Kwo hiki siitiichinyan siiney, kapo kwon saka rabokiitawak? Kwon rabokiita! ²²Dii apa no hecho God riita nona rukusii tawa boboy riiti harapa kwotay tawa boboy. Eeta ma ye nobo heechi iri, God riita yenya kwotayetar. Kwo riiti nobon heechinan siiney riipa kwona eechaba eechaba rukusii takiita. Kwo nobon heechiney, riita kwona tiimiibakiita. ²³Eeta Ju ma yecha kawka hiki siitiichinyey, riipa yenya kawka yeechi eeta tapabak eediichikiita. God rii keena eeta kiki sowa. Riipa keena otiikiita. ²⁴Anadii ma kwo kwasheka tawa oliv me tapan reekii tawaga eecha tawa. Kwo tapa siikenekasakech kwona nowoka tawa oliv mek yaya eekii jir. Ju ma ye eeta nowoka tawa oliv me tawaga eecha tawa. God riita mashi tiimiir tapan yeechi yaya eeta nawaba siikenek eedii jik wonyey, riipa keena otiikiita. Eeta kubuchey boboy.

GOD RIITA EYEW MA RUKUSIITO

²⁵Veenyi tawa maji siikenen ada eeji yaka kumwoy kwona baken hikitu. Ada kwona sawoney, kwo kapo saka wohipukiitawak. Eena ada bako. Maji eetata: Isrel ma kaw ye marenoku hapaga siirek mabiya eechaba eechaba gii takiita. Eechaba eechaba ta i i siinak, eyey God riiti anadii tawa ma ye ya riiti kigdom siikiita. ²⁶Eecha tanak, eeta nobok God rii eyey Isrel ma yenya yesokwa yichikiita. Mashi keyir maji eecha wocho:

“Yesokwa yichi tawa ma rii Saion eeka sokwakiita.

Sokwanak, rii Jekop riiti eyey neja yechi kapase
otii tawa boboyen kwoyava yakiita.

²⁷Ada yechi kapasek boboyen bachi poyenak,
Ada yechaka eecha maji apo dagiikiita.”

²⁸Eeta Ju ma ye God riina ow ana pichawa ma tawak, ye eena riiti hadabas maji wosowoyetawak, ye eeta kwona kiyatayeto. Wowak, God riita Ju ma yechi wayega yenya rukusiichi hikitawak, rii eeta Ju ma yechi nareboy sowa. Nareboy sowak, rii Ju ma kawen hisiir. ²⁹God riita ma yenya rukusiichi hisiiri, rii riiti inyaka upurus hikikasakech. Yahoo.

³⁰Anadii ma tawey, kwo mashi God riina nasowoye tar. Apa Ju ma yecha nasowoye tawey, God riiti rukusii tawa boboy sii eeta kwotak yar.

³¹Kwo mashi kapasek tari, God riita kwona rukusiichi yeyada harebaga, apa Ju ma ye nasowoy tawey, yecha God riita rukusii tawa boboyen eechaba yakiita. ³²Ayo. God riita eyey man otiiniga eyey ma ye nasowoy tarek, poko ji tawak, God riita eyey man riiti yeyada rukusiichi ha tawa boboyen mukuchikiita.

NOTA GOD RIITI HIN NA YESOKWA TA

³³Eyey God riiti boboy riita hiki tawa boboy sii eeta harapa woy tawa. Kapana nama riiti nobon hecho? Kapo nama riiti inyakan hikitu? ³⁴Mashi keyir maji eecha wocho:

“Nama Harapa riiti inyakan hecho?

³⁵Namapa riina maji kepin pokiikiita?

Nama riina boboyen harek,
rii sa yan awasen ha?”

³⁶Rii eeta eyey boboyen otiir mu. Eyey boboyen riita otiir. God riiti hin na eechaba eechaba yesokwa ta.

NOTA NA NOTI MABAN GOD RIINA HA

12 ¹Wowak, eji yaka kumwoy, God riita nona rukusii taweyn, ada eena kwona wohek: kwo na mayama God riina opel ha. Riiti yon otiiken eena ha. Riita inyaka kwoya hikiken eena na ha. Kwo eecha otiiney, sii eeta God riiti hin yesokwa tawa nobo siiken. ²Kwo opoche diita nosapek tawa maga eecha ehishitanakech. Yaho. Kwo na God riitak inyak, riipa kwoti inyakan dareboyechinyak, kwopa akar ma sokwakiita. Sokwanak, kwopa God riiti inyakan hehar hekiita. Kwopa hechi otii tanak, kwopa kwoya woy hikikiita.

GOD RIITA SOBO HAR HADABAS BOBOY YON NOTA OTIIK

³God riita rukusiichi yeyada ha tawa nobok ada kwona bak: Kwo opoche harapa mayaka siiken otiitanakech. Kwota tawabaga sa eechaba hiki ta. Kwota na hiki ta God riita kowna hiki siitiichichawa bobyen harebaga kwo na eechaba hiki ta. ⁴Nota hecho eyey maba nokwapa nokwapa yo otii boboy tawey, ye saniga saniga yon otii ye itu. ⁵No eeta eechaba tawa. Nota nokwapa nokwapa tawey, Kraist riiti mababak eeka sowa. Sowak, nota saniga saniga yoka eecha sowa.

⁶Eecha tawak, God riita riiti rukusii tawa boboyen nona hari, diita boboyen na otii ta. Riita nona God riiti maji sawo tawa boboyen hari, no napa sawo ta. ⁷Riiti yo otiiken hari, no napa riita har woyek otii ta. Maji pokiiken hari, no napa maji pokiita. ⁸Akar man kiyapoken hari, no napa yenya kiyapo ta! Akar man yeyada haken God riita miina wonyey, ii napa hehar ha. Ma siitii kowu tawa yo haney, mi sugu wopu sapa iiban na hiki

ta. Ma yaka kumwoyen inyakapwa hikinak, kiyatayeken otiiney, ii sa inyaka kwoya hikichi kiyatay ta!

ANADII MAN RUKUSII TAWA BOBOY

⁹Kwota yaka kumwoyen rukusii tawey, ii na hehar rukusii ta. kapasek boboyen na harapa yuya ta. Boboy kepin na hehar kiikiirena neeki ta. ¹⁰Kraist riiti kumwoy tawey, yenya na rukusii ta. Anadii ma yechi hin na hehar haba ta. ¹¹Harapa yon na otii ta. Kwo opoche biish shebo shebo yichanakech. Na otii ta. Miita miiti sugu wopun eyey na God riitaban ha tanak, riiti yoban na otii ta. ¹²Kwota Kraist riina kowu tana nedii ii na kwoya hiki ta. Nomoya tawa boboy yaney, ii na kiyayaniga otii ta. Eechaba eechaba nedii God riina maji ba ta. ¹³Kristen yaka kumwoy yecha doponey, ii na awasen yenya kiyatay. Akar akama ma ye kwotak yaney, ii na yenya hehar ta.

¹⁴Anadii ma ye kwona kikir poy taney, ii na God riita yenya rukusiichiken wohecha. Kwo opoche yenya kapasek otii wohe maji batanakech.

¹⁵Ma yecha kwoya hiki taney, kwo na yechaka eechaba kwoya hikiba ta. yecha keya taney, ii kwo yechaka na keyaba ta.

¹⁶Anadii man na hehar tanak, nobo kepin yenya mukuchi cha. Kwo opoche eeche hikitanakech adaba eeta harapa tawa. Kwo na kubuchey yon na otiiba ta. Kwo opoche eeche hikitanakech ada eeta harapa otii hechawa ma.

¹⁷Ma porrii miina kapasek otiiney, mii opoche rina awasen kapasek otiitanakech. Kwota na yo kepiban eyey ma yechi misomak geenyik otii ta. ¹⁸Kwo opoche ow otii inyakan hikitanakech. Owun otii kepi sii tawa nobon hikichi eeka na otii kepi sii. ¹⁹Eeji yaka kumwoy, kwota kwona kapasek otii tawa boboyen eena awasen otiikasakech. God riiti kwotay tawa boboyek riita keena awasen otiikiita. Mashii keyir maji eeche wocho: “Kapasek boboyen awasen otii tawa boboy adapa keena saniga otiikiita. God riita wocho; Ada awasen otiichikiita.” ²⁰Mashii keyir maji eeche wocho: “Miiti yabu pi ma eeche haney, aboboyen na riina ha. Riiti borowaga reekiisiiney, ii na ukun hava ta. Miita eeche otiiney, ii mii eeta riiti masekiik hin tuku tawaga eeche otiito.” ²¹Kwo opoche heechi tanak, kapasek boboy sii kwona dagiir poyetanakech. Kepi boboy siita sa kapasek boboy siina dagiir poy.

NOTA GAVMAN YECHI KURUK NA SII

13 ¹Eyey ma ye sa gavman kurubak ta. Eyey gavman sobo takasakech. God riita hisiichi heechir. ²Ma ye gavman yechi majin nasowoy tawey, ii God riita otiir boboyen nasowoyebato. Eeta ma ye eena nasowoy taney, yepa ya kapasek yakiita. ³Yo kepin otii tawa ma

ye siitii kowu tawa man akiikasakech. Miita gavman man akiichi tanan siiney, ii na boboy ekspiban na otii ta. Miita otii taney, riita miiti hin yesokwakiita. ⁴Gavman ma rii eeta God riiti yo otii tawa ma. Otii tawey, rii miina hehar otiichichu. Mii kapasek yon otiiney, mii na riina akii ta. Rii harapa eekin neekichi siitii tawey, rii kapasek boboyen awasen otiik siikiita. Rii God riiti yo otii wakasa ma. Eecha tawak, rii God riiti kwotay tawa boboyek kapasek otii tawa man yeechi yayato. ⁵Eeta siiken God riita kwotay tawa boboy sii harapa. Wowak, noti sugu wopuk eecha wobatogavman ma yechi maji na sumowu ta. Eena na otii ta.

⁶Eena kwota takis yan hato. Gavman ma ye yechi yon otiiney, ye God riiti yon otiichichu. ⁷Eena takis ya na ha ta. Yecha kwona hehareto. Gavman yennyawa awasen ha ta. Gavman yechi hin na nagwa nagwa haba ta.

MA YE ANADII MAN NA RUKUSII TA

⁸Kwo opoche akar ma yechi boboyen sobo yeechi eechaba tanakech. Sobo ya tawa boboy podat tawa. Diitata: Akar man na awasen awasenrukusii ta. Ma ye akar man rukusii tawey, rii lo majin sumowutu. ⁹Lo maji diitata: “Opoche nobo miman anemesherotanakech. Man pi sowakwotanakech. Hiyiyatanakech. Boboyen kwoyahechanakech.” Diitata akar taba taweyn diita lo siiti mu eeta chegiibak tawa. Maji sii diitata: “Miita mayama rukusii tawaga, akar ma bana taweyn na eechaba rukusii ta.” ¹⁰Eeta ma rii bana tawa man rukusii taney, rii riina kapasek boboyen saka otii takiitawak. Ma ye eena rukusii taney, rii riina kapasek boboyen saka otii takiitawak. Ma ye eena rukusii tawey, rii eeta eyey lo majin sumowutu.

NO HEHAR IK

¹¹Kwo diita nedii hikitu. Eena na eecha otii ta. Apa watawey, na heechi sokwa. Nota hikitu yesokwa yichi tawa boboy sii ya bana bana siito. Mashi kwo eena saka hiki tarek. ¹²Niy nedii sii eeta hamato. Yadii sii bana bana siito. Uhadiiken otiito. Nota niy yon opoche otiitanakech. yadiik keyapo chichi ow ana pichawa bobyen na yeechi yaya. ¹³Nota na hehar chish taney, ma yadii chishi tawaga eecha na chishi ta. Opoche wohipu tanak, beyitanakech. Opoche nobo miman anamesheroko ye itanakech. Keha tawa nobok anamesheroko ye itanakech. No ow maji ba tanak, mey boboyen kwoya hekasakech. ¹⁴Kwota na Harapa Jisas Kraist riina yeechi ow ana pichawak ruwu tawa boboyega eechaba hehar na ruwu ta. Opoche kwoti maba siiti nobon sumowutanakech.

NOTA YAKA KUMWOY YECHI NOBON SANIGA SANIGA TAKIICHIKASAKECH

14 ¹Ma por hehar hiki siitiichinyan siiney, ii na riina yeechi yopo yichi tawa eemek yaya. Iipa kwo riina nokwapa nokwapa

maji ba yopotanakech. ²Ma por rii hiki siitiichichawey, rii nokwapa nokwapa aboboyen ato. Wowak, kiiriisiiposii hiki siitiichichawa ma rii kiya akasakech. ³Kiya atawa ma rii opoche kiya nan biish tawa ma riiti nobon dasiipiitanakech. Wowak ma kiya anan biish tawey, mii opoche kiyan a tawa ma riiti nobon reekiitanakech. Yahoo. God riita eeta ma riin yabakiita. ⁴Mii nama akar ma riiti yo otii wakasa man wosowoyet? Riita riiti yok tanak hapaga siichi tanak, saka sowakwoney, ii riiti harapa ma riiti yo. Eeta Harapa riiti otiichinyak, riita hapaga siichi siitii otiiken wonyey, riipa otiikiita. ⁵Ma por rii eeche hikitu eeta yadii pochi sii eeta harapa tawak, eeta yadii kawka ye eeta kubuchey boboy. Anadii ma por rii way eeche hikitu eyey nedii ye eeta kikibak tawa. Eyey ma eeche hiki tawey, eena na hehar hiki ta. ⁶Ma por rii yadii pochin harapa hiki tawey, rii Harapa riiti hin yesokwa taken eena otiito. Eeta ma por rii eyey aboboyen aken otii tawey, riita Harapa riiti hin yesokwaken eena otiito. Riita God riina woshiachichi ato. Eeta ma rii aboboy kawen anan heechi tawey, rii Harapa riiti hin yesokwabato. Rii God riina woshiabato.

⁷Saniga biish ta ma kwotakeecha por takasakech. Rii haney, riitaba saniga hakasakech. Eyey ma kiki kapa meejibakiita. Nota sobo tawey, no Harapa riiti hin yesokwa takiita. ⁸Nota haney, Harapa riiti hin yesokwa takiita. Nota sobo tawey, no haney, no eeta Harapa riiti. ⁹Kraist riita hachi ya sokwarek, worek, eena apa riita ha tawa ma sobo tawa ma yechi Harapa.

¹⁰Eecha tawey, kwo boyewak, yaka kumwoy yenya wosowoyetu. Boyewak yenya yuyato? Komasa nota God riiti misomak siitii anasakiita.

¹¹Mashikeyir maji eeche wocho:

“Harapa rii eeche wocho: ‘Eeta siiken komasa eyey ma yatii jumuk sakachi eeche wokiita, Ada eeta God.’ ”

¹²Eena wocho, nota eyey ma ta ye i tawey, noti eyey yon God riitabangeenyik kwodii wo mukuchikiita.

NO OPOCHE NOTI YAKA KUMWOYEN OTIICHINYAK YE TIPIIKEYINEECHI SAKATANAKECH

¹³Wowak, kwo kwoti yaka kumwoyen wosowoye tawey, ii sakayekasii. Yahoo. Diina na hikichi otii ta: No opoche noti yaka kumwoyen otiichinyak, ye tiipikeyineechi saka kapasek boboyen otiitanakech.

¹⁴Ada Kraist riitaka tawey, riita ana maji pokiirek, ada hehar hecho boboy sii saniga otiiniga kehakasakech. Ma eeche hikiney keha tawey, sii eeta riina mayama otii kehato. ¹⁵Miita aboboy kepin atanak, miiti yaka kumwoy eena hechi bokonak hikiney, ii miita rukusii tawa nobok saka otii tawak. Kraist rii eeta yaka kumwoyen har. Opoche riita pochi

kapasek otiitanakech! ¹⁶Kwota boboy kepika tawey, opoche anadii ma ye kwoti boboyen wokwoyatanakech. ¹⁷Uku atawa boboy, kiya nokun atawa boboy, sii God riiti maji mu takasakech. God riiti kigdom diitata: Nagwa nagwa otii tawa boboy, inyaka kwoya hikitawa boboy, inyaka wok hapaga siichi tawa boboy. Eeta boboyen Holi Spirit riitaba hato. ¹⁸Eeta ma rii Kraist riiti yon eeche otii taney, God riita riina hechi ri inyaka eeta kwoya hikitu. Ma yecha eena hechi wohowutu.

¹⁹Eena nota eechaba eechaba nedii anadii man kepiba kwoyaba otii ta. Ma ye hapaga siichi kepi taken eena na eechaba eechaba otii ta. ²⁰Kwo opoche aboboyeban hiki tanak, God riiti yon otiiniga kapasek siitanakech. Eyey atawa boboy eeta kepi. Wowak, mii atanak, miiti yaka kumwoyen otiichinyak saka sowakwoney, ii eeta kapasek. ²¹Miita wain ukun ataney, kiyen atanak, akar boboyen otii tanak miiti yaka kumwoy ye eeka saka sowakwoney, ii siikayekiisii. ²²Miiti hiki siitiichichawa boboy sii eeta miitaka God riitaka kichiyiba. Eeta ma rii otiichi mayama wohowu tawey, mayama otiichi wokwoyaman siiney, rii sapa eeta kowya hiki ta. ²³Ma rii inyaka upurus hikichi ataney, anak, God riita riina wosoboyekiita. Rii hiki siitiichikasakech, eena eeche otiito. Eyey boboyen ma yecha otiiniga hiki siitiichinyan siiney, ii kapasek boboyeka eeche tawa.

KWO KRAIST RIITI INYAKAN NA SUJMOWUTA

15 ¹Nota hiki siitiichichawa ma tawey, nota ameda hiki siitiichichawa ma yecha kiya tawa boboy eena na kiyapo ta. Nota noti saniga nobok ikasakech. ²Yaho. Nota saniga saniga notaka eeche bana bana tawa man na kiyapo tanak, yecha harapa hiki siitiichiken eena na kiyapo ta. ³No hikitu Kraist riita riiti nobon sumowukasakech. Mashi keyir maji eeche wocho: “Eeta ma ye kwotaka eeche tawey, yecha maji kapaseken batawey, eeta maji sii ya ana gamupoyebato!” ⁴Mashi keyir maji siin keyiri, nona mukuchiken eena keyir. Eeta maji keyiri, nota hiki siitiichi hapaga siichi tanak, no God riina kowu tanak, riita ya nona yakiita. ⁵God riita otiichichawak, ma ye kiya yaniga otiito. Apoko tawey, riita heharechichu. Riita eeche otiichichawey, eena ada riina wohecho kwota na podateba inyakabak ta. Kraist riiti nobok eeka na ta. ⁶Eeche tanak kwota God riiti hin Harapa Jisas Kraist riiti hin kikibak yesokwa takiita.

KRIAST RII JU MA YENYA ANADII MA YECHAKA EECHA OTII KEPI SIIR

⁷Wowak, Kraist riita kwona eeche yari, kwo napa anadii man eechaba yaya ta. Yaya otiichinyak, God riiti hin yesokwa takiita. ⁸Ada kwona wocho Kraist rii Ju ma yechi yo otii wakasa maga eeche siir. Siirek, rii

eeta boboyen nona mukuchir God rii eeta siiken. Eecha otiirek, God riita noti wayega yenya wochar majin sii eeta siiken. Eecha otiirek, God riita noti wayega yenya wochar majin sii eeta sokwar. ⁹Riita wakasa maga siirek, anadii shebo shebo tar ma ye God riita rukusiichi otii tar boboyen hechi God riiti hin yesokwa tar. Mashi keyir maji eecha wocho:

“Eena ada miiti hin anadii ma yechak yesokwa takiita.
Ada miiti hin hokwak chi yesokwa takiita.”

¹⁰Mashi keyir maji kawka eecha wocho:

“Kwo shebo shebo tawa anadii ma God riita hisiir
ma yechaka eecha na kwoya hiki ta!”

¹¹Kawka eecha wocho:

“Shebo shebo tawa ma kwo Harapa riiti hin
na yesokwa ta.
Kwo eyey ma mima riiti hin na harapa yesokwa ta!”

¹²Aisaia eecha wobato:

“Eeta Jesi riiti neja por riipa yakiita.
Riita yanak, riipa sokwachi shebo shebo biish
tawa ma yenya siiti kowu takiita.
Wonyak, yecha riina hiki siitiichinyak,
kowu takiita.

¹³Noti God rii nona hapaga tawa boboyen hato. Eena ada riina wohecho kwo riina hiki siitiichichawak, riipa kwoti inyagak kwoya hiki tawa bbobyen sawoyamokiita. Sawoyamonak, Holi Spirit riiti hapaga tawa boboyek kwon yesokwanak, kwo Jisas riina kowu tanak, na eechaba kowu ta.

POL RII RIITA OTII TAR YON KWOYA HIKI TAR

¹⁴Eeji yaka kumwoy, na meeji: Ada eecha hikitu boboy kepi sii kwona takiikiisiir. Kwo hehar otii hecho. Eecha tawak, eena kwota awasen awasen maji pokiitakiita. ¹⁵Ada diita majin keyiri, ada ana beyichi siitii tawak, eena ada kwona wocho. God riita ana diita yon harek, eena ada ana beyichi siitii bato. ¹⁶Ada Jisas Kraist riiti yo otii wakasa ma shebo shebo tawa ma yenya sawo tawa ma. Ada hadabas maji sawo tawey, ada opelen otii tawa ma tawa. Shebo shebo tawa ma yenya God riina opel kepiga otiiken eena ada sawo mukuchichu. Holi Spirit riita yenya riina haken eena otiito.

¹⁷Ada Jisas Kraist riitaka eecha chishi tawey, ada God riiti yon otii tawey, ada ana beyichi siitiito. ¹⁸⁻¹⁹Ana beyichi siiti tawak, ada Kraist riita adaka yo

eecha otii tariban ada bako. Majik, yok mirakelen, jebwan, Holi Spirit hapaga tawa nobok ada shebo shebo tawa ma yenya hapaga boboyen ana harek, ada Jerusalem akama heechi akar eemek ichar. An i i Ilirikam nosapek i siir. I siirek, ada Kraist riiti hadabasmajin sawotar. ²⁰Diita maji kepin ada sawo ye iken otii tawey, anadii ma kaw ye Kraist riiti hin meejikasakech. Eecha otii tawey akar mak aka kwatiin woy siitiichiri anapa sakapa eeta eemebak kwatii woyekiitawak. ²¹Mashi keyir maji eecha wocho:

“Eeta ma ye riiti hin meejinan siiri,
yepa riina hekiita.
Eeta ma ye riiti maji meejinan siiri,
yepa hehar meejikiita.”

POL RIITA ROM AKAMAK IKEN HIKI TAR

²²Diita yo sii eji i kwona he nobon eechaba eechaba dasepiito. Wowak, ada kwona saka ya hechawak. ²³Apa ada diita nosapek otii tawa yo sii eeta hamato. Nokwapa nokwapa sukwiya ada eechaba i heken gegi yatar. ²⁴Ada Spen nosapek tawa ma miman heken inyak ada kwona hebak hikitu. Ada ya kwotaka ameda sinak, kwo ana kiyatayenak, ada Spen nosapek ikiita.

²⁵Wowak, apa ada Jerusalem akamak tawa God riiti ma miman kiyapowuken ik. ²⁶Masedonia ma mima ye Grik ma mima ye God riiti ma ye Jerusalem akamak kiiriisiiposii taweyn yenya moni yan haken hiki tar. ²⁷Yechaba saniga hikichi eecha otii tar. Wowak, yecha kiiriisiiposii tawa Ju ma yenya yeyadii har boboyeka eecha tawa. Boyewak? Ju ma ye yechi spiriteka tar boboy kepin shebo shebo tawa ma yenya homachi kapwoy pakar. Eena shebo shebo anadii ma yecha sa yechi ya kepin Ju ma yenya awasen ha.

²⁸Ada diita yon otii hamachi eyey har moni yan Jerusalem ma mima yenya heechi ada Spen ichawa nobok inyak, eeta nediik ada kwona hekiita. ²⁹Ada kwona henyak, ada eeta hikitu God riita ana hadabas boboyen hanak, ada kwona hakiita.

³⁰Yaka kumwoy, ada kwona wohecho Harapa Jisas Kraist riiti nobok, Spirit riita har rukusii tawa nobok kwota ana na eechaba God riina harapa maji bachibata. ³¹God riina na wohechanak, ada Jisas riina hikiinan biish tawa Ju ma yechi tapak saka ikiitawak. Na eechaba wohecha ada Jerusalem yo otii tanak ma mima yecha wohowu takiita. ³²Wonyak, ada heechi God riita hikiney, ada kwotaka eecha ya tanak, kwoya hikichi kwotaka yihapakakiita. ³³Noti God rii eeta eshar tawa maji God rii eeta eshar tawa maji mu. Rii sa kwotaka eecha ta.

POL RIITA NOKWAPA NOKWAPA MA MIMAN WOSHIAR

16 ¹Ada Fibi siina majin bato. Siita mima kepi tawey, sii Senkria yopo yichi tawa man hehareto. ²Siina Harapa riiti hik na yanak,

siita dopo tawa boboyen siina na ha ta. Dii eeta God riiti ma mima yecha otii tawa abo. Siita nokwapa nokwapa ma mima yenya kiyatay tarek, siita ana kiyatayeba tar.

³Priska, Akwila piiriita adaka Kraist Jisas riiti yon eecha otii tar. Eena piiriina na woshiata. ⁴Piir ana kiyatay tarek, anadii ma ye piiriina pi sowakwo baken otii tar. Eena adaba woshiakasakech. Eyey eemek ya yopo wuchi yichawa ma kwo na woshiaba ta. ⁵Kwota na piiriiti akamak yayopo wuchi yichawa ma yenya woshiaba ta.

Kwota na Epinitas riina woshiaba ta. Esia ma rii mapo Kraist riina hiki siitiichir ma.

⁶Kwota na eeji woshiatawa majin, Maria siina babata. Sii kwona harapa yo mayakan otii tar.

⁷Kwota eeji woshiatawa majin Andronaikas, Junias piiriina woshiaba ta. Piir aposelhi kepika eecha tar. Piiriitaka adaka poko ji tar. Piir mapo sokwa Kristen ma siir. Adakomas siir.

⁸Kwo eeji woshiatawa maji Amplitas riina haba ta. Rii eeji nareboy siiken sicha Kraist riitaka eecha tar.

⁹Kwota eeji woshiatawa majin Eban riina haba ta. Rii nota yo Kraist riina kiki otii tar ma. Kwo na Stekis riina eeji woshia majin baba ta. Rii eeta eeji nareboy siiken.

¹⁰Kwo na eeji woshia majin Apelis riina baba ta. Apelis rii Kraist riina sumowu tar hiki eecha tawa.

Kwota na Aristobyulas riiti akan woshiaba ta.

¹¹Kwota na eeji woshia majin Herodionriina woshiaba ta. Rii eeta eeji akama ma.

Kwota eeji woshia majin Nasisas riiti Kristen akan na woshiata.

¹²Kwota na eeji woshia majin Traipina Traiposa piiriina aba ta. Piiriita Harapa riiti yon otii tar.

Kwo eeji woshia majin Pesis riina na baba ta. Riita Harapa riiti yon harapa otii tar. ¹³Kwota eeji woshia majin Rupas riina na baba ta. Riita Harapa riiti yon harapa otii tar. Riiti awi siina na woshiaba ta. Sii eeta eeji awiga eecha tar.

¹⁴Kwota eeji woshia majin Asinkritas, Piligon, Hemis, Patrobas, Hemas, akar yaka kumwoy ta ye i ta weyika yenya na eecha woshia ta.

¹⁵Kwota na eeji woshia majin Filologas riina Julia siina baba ta. Nerias riin riiti nowiyika eecha na woshiaba ta. Kwo eeji woshia majin Olimpasi riina eyey God riiti ma mima riitaka eechatawey, yenya na woshiaba ta.

¹⁶God riiti ma mima nota otii tawa abo eyey ma miman tapa neeki woshia ye i ta. Eyey God riiti yopo yichawa ma ye kwona woshia ye itu.

POL RIITA OW POY SIICHI TA MAJI BAR

¹⁷Yaka kumwoy, ada kwona maji bak. Na siitii kowu ta. Yopo wuchi yichawa boboyen reekii tawa ma yenya na ow poy sii ta. Yecha hiki

siitii chichawa boboyen kapasek otiol Yecha kwoti maji kepin meejirin ye eena wosowoyetu. Yenya na taveye ta. ¹⁸Eecha tawa yikadey ma ye noti Harapa Kraist, riiti yon otiikasakech. Ye yechi maba siiti noboban eena sumowutu. Ye andii ma yenya maji sabwi ba tawak, ye ameda hiki tawa ma yenyawoshepiichi kapasek nobon mukuchichu. ¹⁹Kwo hadabas nobon sumowu tari, eyey ta ye i tar ma ye eena meejir. Ada eena meejibatawey, ada kwoya hikibato. Ada eecha otiiken hikitu kwota na hehar hikichi boboy kepin na hehar sumowu ta. Kapasek boboyen na heechi ta. ²⁰Wonyak, God riipa Gaba riina pichi riita kwoti yatii jumuk piitii monyekiita.

Harapa Jisas riiti yeyada rukusii tawa boboy kwotaka sa eecha ta.

MA KAW YE ROM YENYA WOSHIACHIREK YAR

²¹Ada yo mesh otii tar ma, Timoti, rii kwona woshiato. Lusias, Jeson, Sosipata, ye nota podat akama ma, ye kwona woshiabato. ²²Ada Tetias. Ada diita jeyen Pol riina keyichir. Ada kwona Harapa riiti hik woshiabato.

²³Gaias rii kwona woshiabato. Ada riiti akak wato. Ya yopo yichi tawa ma ye riiti akak ya yopo wuchi yichu.

Erasta rii noti kumwoy Kwotas piir kwona woshiabato. Erasta rii diita akama gavman yechi yan siitii kowu tar ma.

²⁴(Harapa Jisas Kraist riiti yeyada rukusii tawa boboy sii sa kwotaka eecha ta.)

GOD RIITI HIN NA YESOKWA TA!

²⁵⁻²⁶Rii eeta kiki sowa. Hadabas maji eecha wocho. Riita keena otiichinyak, kwo kwoti hiki siitiichichawa boboyeka eecha ana beyichi siikiita. Diita hadabas maji ada sawo tawey, Jisas Kraist riina geenyik ba tawa maji sii eecha wocho. Diita maji sii mashi veenyichi tarek, apa piirapet keyir maji sii sokwa geenyik sowa. Eechaba eechaba tawa God riita worek, diita maji sii sokwa eyey nosapek i ye ya tanak, ma mima ye sa eena hiki siitiichi eena na sumowu ta. ²⁷Eena nota na eeta otii hechawa God podareba riiti hin Jisas Kraist riiti hik na yesokwa ta. Amen.